

E siman aki OHL Arellano cu SOGA ta firma pa ehecucion di Hospital

ORANJESTAD - E siman aki ta firma e contract pa e ehecucion di e proyecto dr. Horacio Oduber Hospital. Diaranson 16 di april 2014 e firmamento di e contract cu e contratista mayor cu a gana e bid, OHL Arellano cu SOGA, pa loke ta renobacion y ampliacion di dr. Horacio Oduber Hospital.



Hunto cu Prome Minister Mike Eman, ministernan Sevinger y Schwengle kende nan tambe ta pone nan firma bou e documento. Esaki lo ta den forma di un ceremonia cu lo ta tuma luga den Renaissance Convention Center. Segun informacion ricibi di gobierno, e documento cu ta firma ta un contract di un asina yama GMP (Gross Maximum Price), loke ta encera cu e prijs aki no por subi mas di loke a keda combeni. Baha si e por baha. Su renobacion ta encera fase IA, cu ta e toren nobo na unda e camanan ta bay ta, fase IB ta e Medical Office Building, unda specialistanan ta bay tin nan oficina y fase II ta renobacion di e parti existente di hospital.

Privacidad di e pashent

Segun gobierno, mescos e calidad di cuido, privacidad di e pashent ta un punto central den renobacion di hospital. E departamento di 'Spoedeisende Hulp' ta bay haya dos entrada, pa asina pashentnan di trauma (accidente y otronan cu ta bin cu ambulance) no mester pasa mas dilanti tur hende den gang, pero ta bay directo den e sala di SEH. Un paso importante den garantisar privacidad di e pashent. Tambe e cambernan cu awor tin seis pa shete hende den nan, ta bay tin solamente un te dos pashent.

Sub-contratista local

Un exigencia grandi di parti di gobierno ta pa OHL Arellano, e contratista principal

haci uzo di sub-contratistanan local. Asina compañanan manera Bohama NV, Croon NV, Albo Aruba N.V., CHS Technical Contracting y otronan ta parti di e trabounan grandi cu ta bay wordo haci den ehecucion di e proyecto enorme aki.

Esunnan buscando trabou

Na mes momento cu firma e contract ta habri tambe un 'webportal'. Riba e portal digital aki ta pone tur ofishi cu mester pa cumpli cu e trabou. Pa e periodo di construccion lo mester di un alrededor di 200 pa 250 hende pa traha y esunnan cu ta en busca di un trabou por wak aki riba e webportal y por solicita di e forma aki pa por traha den e proyecto aki.

Groundbreaking

E proyecto ta bay tin un duracion di 4 aña y mei y na fin di luna di Mei e trabounan di construccion mes ta cuminsa. Esaki pasobra falta algun material pa bin di afo ainda prome por start cu e inmenso trabounan. Lo tin un groundbreaking pa duna inicio na ehecucion di e trabou grandi aki cu ta bay tuma luga na Aruba.